

鞏縣志卷之六

知縣德州周泗校

生員康紹第集

執文

奉

天承運

皇帝勅曰旌獎賢勞乃朝廷之著典顯揚先德亦人子之至情茲惟禮典之常豈有幽明之間爾康俊乃山西布政使司經歷司經歷偉之父詩禮傳家丘園養素居鄉樂善夙敦仁厚之風教子成名久著勤勞之

鞏縣志

卷之六

一

經川圖書館校刊

績祿養既違於三釜褒封宜貫乎九原茲特贈爲儒林郎經歷尙期神爽之昭宜迓寵靈之至

勅曰孝子愛親之心每切於既歿朝廷推恩之典無間於生存故凡得綸絲之褒亦可紓風木之感爾張氏乃山西布政使司經歷司經歷偉之母性本慈良行惟勤儉相夫治內賢聲著於族媼教子居官嘉績成於藩幕宜舉推思之典用伸報德之情茲特贈爲安人渙號是承幽明永慰

奉

天承運

皇帝勅曰國家設藩司以統一方之

若簡而實煩任若輕而亦重既書考最宜褒封爾山
西布政使司經歷司經歷康偉擢秀一方歷官三縣
久著親民之績遂陞入幕之僚綜理詳明文移不忒
操持清慎行檢克修歷歲既深課功居最爰稽彝典
用是褒嘉茲特進爾階儒林郎錫之勅命於戲朝廷
懸爵祿以待士用徵名績之成人臣竭勤勞以奉公
無替初終之節勉遵彝訓以俟超陞欽哉

勅曰人臣有勞於國朝廷必寵其家肆惟伉儷之亦
被褒封之命典章具在存歿攸資爾山西布政使司

鞏縣志

卷之六

一一

經川圖書館校刊

經歷司經歷偉妻劉氏出自華族嬪於儒門禮義相
承方著宜家之美琴瑟中節竟違偕老之心宜媿夫
階以伸卹命茲特贈爲安人懿靈如在茂渥其承
勅曰婦職主於饋祀名不可虛君寵重於褒封禮不可
廢此國家之定制實閨閣之重榮爾山西布政使司
經歷司經歷偉繼室石氏稟質柔嘉持身謹飭夙遵
姆訓繼配儒流并曰勤勞雖未躬於家室蘋蘩孝敬
亦克效於宗枋宜錫褒章以旌內助茲特封爲安人
尙其祇奉益迓寵光

奉

天承運

皇帝勅曰人子之孝莫大於顯親朝廷之恩莫重於褒善此古今之通制豈存歿之殊科爾宋忠乃陝西涇陽縣知縣鑑之父蹟晦丘園家傳詩禮篤生令子久著勤勞既遠祿養之榮宜示褒崇之命茲特贈爲文林郎陝西西安府涇陽縣知縣尙期神爽宜迓寵光勅曰母德之成義實兼於教育國恩之錫禮特重於褒封肆綠報德之情誕示追崇之命爾孟氏乃陝西西安府涇陽縣知縣鑑之母生有懿質嬪於名門相夫敦勤儉之風教子著賢勞之績祿養既違於三釜褒

鞏縣志

卷之六

三

經川圖書館校刊

章宜貫於九原茲特贈爾爲孺人歆服寵命永昭冥漠

奉

天承運

皇帝勅曰郡縣親民之政非久不成朝廷錫命之恩推賢是予顧典章之俱在實激勸之所關爾陝西西安府涇陽縣知縣宋鑑起自鄉科出司民社愛下式勞於撫字持身克篤於慎勤歷歲既深謀功斯最愛稽大典庸示褒恩茲特進爾文林郎錫之勅命於戲治民先於獲上已臻文績之良善始貴平保終庶竭猷

爲之益訓詞俱在尙克祇承欽哉

勅曰臣有事君之忠妻有從夫之義故錄賢勞於國必推寵命於家存歿雖殊恩典則一爾陝西西安府涇陽縣知縣鑑之妻楊氏嬪於儒流方資內助之勞遽違偕老之願爰因夫貴用示國恩茲特贈爲孺人靈爽有知歆承無斃

勅曰室當有繼式陳饋祀之儀恩貴乎均庸及褒封之命茲惟典禮實體恆情爾陝西西安府涇陽縣知縣鑑繼室劉氏夙遵姆訓繼配儒流未躬荆布之勞亦效蘋蘩之職夫偕旣陟恩典宜頒茲特贈爲孺人服

鞏縣志

卷之六

四

經川圖書館校刊

此嘉名益敦祇慎

奉

天承運

皇帝勅曰朕惟爲人臣者孰不欲顯揚其親故朝廷於人臣效職者必推恩以報之所以遂其顯揚之心而勸天下之爲孝者也爾馬忠乃湖廣道監察御史隆之父善積厥躬訓成令子推原其本恩典宜頒茲特封爾爲文林郎湖廣道監察御史服此隆恩益綿壽祉勅曰孝子之愛親者靡有存亡之間故朝廷推恩臣下必及其親者所以體其心而重大倫也爾張氏乃湖

廣道監察御史馬隆之母善著閨門訓成令子推恩
所自卹典宜頒茲特贈孺人九原有知服此寵命

奉

天承運

皇帝勅曰朝廷設監察御史欲其振紀綱勵風俗以弼
成國家之治者也非廉慎明敏之士不輕畀焉爾湖
廣道監察御史馬隆發自賢科屢更縣令克勤撫字
茂著聲稱迨進令官振揚風紀宜錫寵恩以旌勞勩
用是進爾階文林郎錫之勅命以爲爾榮夫官以察
爲明以言爲責是故畧細故而存大體扶君子而抑

小人爾尙宜正乃心益潔乃行毋私於法毋撓於勢
毋訐以爲直毋苛以爲能夙夜懋修用昭寵命欽哉
勅曰夫婦人之大倫朝廷推恩臣下命必及之而於
存沒一也爾湖廣道監察御史馬隆妻王氏克相其
夫而已早沒茲特贈爲孺人爾其有知昭斯寵命
勅曰國家推恩臣下而必及其室家者所以厚人倫之
本也爾湖廣道監察御史馬隆繼室李氏恪修婦道
以相其夫茲特贈爲孺人服茲恩榮永光閨闈
勅曰山西按察司副使馬隆代州倫頭寧武等關介乎
大同延綏兩關與豐州東勝等處接壤虜賊夏秋以

爲巢穴住牧入春於此過河入套爲賊衆經行緊要之地今特命爾常川往來前項地方整飭兵備操練軍馬修理城池墩臺隘口兼督糧草問理軍民詞訟不許干預別事有誤邊備爾爲憲臣受茲委託務要持廉秉公正已率人凡事須要與各該鎮守巡撫分守中備等官公同計議從長處置毋得偏私執拗致誤委用如違罪有所關爾其慎之慎之故勅

奉

天承運

皇帝勅曰國家分建六曹各專一幕所以綜文移之出

鞏縣志

卷之六

六

經川圖書館校刊

納稽吏事之情勤事若簡而實煩任若輕而實重茲惟慎選務在得人爾兵部司務劉遜天賦英資人稱遠器鄉闈登薦部幕列官綜理精詳事不勞而畢集操持清慎名以著而益勤課功旣邁乎常倫褒寵適逢矢慶賚茲特進爾階登仕佐郎錫之勅命於戲官在明揚簡拔尙需於來效恩當圖報懋修勿替於初心勉副訓詞嗣膺顯擢欽哉

奉

天承運

皇帝勅曰工部古冬官之職厥屬有四而責任並重必

得其人乃克濟焉爾南京工部營繕清吏司主事趙
迎蔚以俊才奮登甲第授官郎署往詢留都克慎克
勤賢聲茂著爰頒渥命以示寵褒茲特進爾階承德
郎錫之勅命爾其益盡乃心益修乃業嗣膺峻陟副
此命詞欽哉

勅曰朝廷敷錫羣臣愛及厥配實惟內助之良有相成
之道焉爾南京工部營繕清吏司主事趙迎妻王氏
恪修婦道善相其夫夫既顯榮爾宜並貴茲特封爲
安人祇服休命益慎壺儀

奉

鞏縣志

卷之六

七

經川圖書館校刊

天承運

皇帝勅曰朕以元嗣誕祥覃澤宇內凡仕於朝者咸得
以推揚其所生所以廣恩渥均休慶也爾原任陝西
慶陽府推官趙璠乃南京工部營繕清吏司主事迎
之父供職勤能持身謹厚訓成令子克振前休推厥
所由宜申卹典茲特贈爲承德郎南京工部營繕清
吏司主事惟爾有知歆於時命

勅曰賢才之興雖由父訓而資於母德恆多故褒典均
焉爾符氏乃南京工部營繕清吏司主事趙迎之母
順以相夫慈能成子爰頒渥命用旌爾賢茲特贈爲

安人懿靈不昧享茲茂恩

奉

天承運

皇帝勅曰朕惟鴻臚之職典司朝儀爲國近侍厥責攸重必得其人乃克稱焉爾鴻臚司序班李復啟發身胄監擢任今官勤慎著聞宜有褒嘉茲特進爾階登仕佐郎錫之誥勅爾其宜盡乃心修乃職以俟顯擢光我訓詞欽哉

御製祭文

洪武四年

鞏縣志

卷之六

八

經川圖書館校刊

皇帝遣祕書監丞陶誼致祭於

宋太祖皇帝之陵曩古有元失政天下紛紛朕由此集衆平亂統一天下今已四年矣稽諸古典自堯舜繼天立極列聖相傳爲萬民主者陵各有在雖去古千百餘載時君當修祀之朕典百神之祀故遣官賫牲醴奠祭修陵君靈不昧尙惟歆享

洪武三十五年

皇帝遣道士仕實沈與真致祭

宋太宗皇帝曰自古有天下功德及民者當享百世之祀我國家崇祀古昔帝王厥有常典今朕遵承

祖訓奉

天征討卽位之初永惟

聖帝明王陵寢所在不可不敬是用奉幣帛牲醴以祭

惟皇有治世之功有安民之德歷世雖遠神靈不亡

其尙默贊玄化孚佑下民俾臻太平之福朕其敬祀

萬世無斃尙享

永樂三年

皇帝遣鞏縣知縣劉安致祭

宋太祖皇帝

宋太宗皇帝

鞏縣志

卷之六

九

經川圖書館校刊

宋真宗皇帝

宋仁宗皇帝曰昔者奉

天明命相繼爲君代天理物撫育黔黎彝倫攸序井井

繩繩至今承之生民多福思不忘以報特遣官賫捧

帛幣命有司詣陵致祭惟

帝英靈來歆來格尙享

鞏縣重修廟學記 行人司行人洛陽黎良撰

洛陽東百三十里許曰鞏縣蓋因山河四塞而得名

也鞏治正南有先師孔子廟學附焉其創建遠矣惟

正殿巋然頗無傾頽殿與戟門兩旁凡若干楹曰廚

與庫暨兩廡門牆咸震凌就圯蕪穢不治廟前雜以
居民喧愀可厭關中沈侯源字澄夫以鄉進士來尹
茲土旣滌篆卽首謁先師孔子廟喟然興歎曰廟宇
乃棲神之區學校實首善之地今若此有司之先務
有急於此者乎越一載政通人和乃鳩工集事正殿
之有缺落者咸補足之旣完旣美乃輪乃奐勅建兩
廡二十四楹中肖郡賢像繪事視先師配哲丹青炳
煥金碧輝煌以至櫺星大成重門洞啟牆垣廚庫百
廢皆興以錙幣易前居民之地廣六丈有奇而袤四
倍之先師正殿高居迴暇遠絕塵囂如撥雲見天甚

快觀望籩豆壘爵器飭五彩金聲玉振樂備八音以
至籥羽之儀袍服之制偕手並作鼎然一新又移學
后居民於玉仙聖母廟旁隙地得地袤十有五丈廣
三之二建射圃亭以爲生徒觀德之所餘地之租入
貯學庫充新增祭物二十四品代民出辦且備修葺
區畫規制井井有條經始於嘉靖二年二月戊子至
次年四月辛巳實落成之期也一日司訓丘隆遣生
員岳恆張臻持狀謁予請記予習知沈侯賢又與鞏
士大夫多交善遜謝弗克遂因而告之曰尊師重道
興學毓賢沈侯其知急先務也爲鞏之師者立其道

爲鞏之士者善其學於牆高宮廣之中際禮備樂和之盛仰高山景先哲蓋將得其門升其堂而入其室矣扶持天常植立人紀倡率化導之功不可誣侯將奏最明廷榮膺顯用更將以是心而布之字內也乎鞏縣重修儒學記 鈞州知州華亭范惟一譔

范子曰余至鈞陽蓋聞鞏有茂宰謝子云癸卯秋予與謝子並以臺檄有事於梁見其人間然朴茂真實有古循良風余甚異之乃謝之欣遇予也是年冬謝子以書柬曰鞏學敝久矣走承乏踵令於茲有疚心焉謹出已俸謀於邑之大夫士及民有力者咸聞義而起程蓄而輸今當落成也敢請言於下執事其學博趙子亦奏記諸詣余曰謝子之舉鞏學也每推君爲山斗願君文之以紀故實詔來世也范子曰令哉謝子當於古人中求之矣古之君子視同宇內凡震風凌雨之患皆有戚於心而切於已況學校首善之地禮樂政化之所繇忠哲賢材之所總顧圯焉弗治其孰能安之予聞謝子之爲鞏也振災補滯百廢俱舉而於修學官師勵人士尤舉爲上務其於學之成也與師生舉酒落之躬釋菜禮進人士而倡以明倫之學鞏之諸人士有不翕然興起者乎魯僖公之

作泮也詩人誦之曰濟濟多士克廣德心嗟乎鞏之諸人士苟由此而廣德心也則謝子之爲政豈獨功德於鞏哉李唐人韋景駿曾令肥鄉繕治學廬館舍以處髦士他日過之兒曹悉至迎勞以獲見爲幸夫景駿所以列於循良者雖其治壯偉然而興學尤其大者近聞謝子將報政而留內矣然則他日鞏人猶有景駿之思乎余又聞謝子大父嘗令偃師名至令藉甚令謝子復有聲於鞏又可謂能世其業矣是舉也計幣凡三百緡建兩廡廊舍凡三十楹其櫺星戟門甬道牆垣俱仍舊址而增葺之經始於嘉靖壬寅八月落成於甲辰三月而余之記則作於是年十月若夫兼總貫條經理區畫耆老譚朝之功居多焉因併及云

鞏縣任侯遺愛碑記 給事中三山許天錫撰

關中于克宏尹鞏縣再寒暑政事通百廢舉暇曰召父老進於庭詢之曰若等爲邑氓近期耄前令之賢稔知之有得民心而去思者第言之無隱諱吾將勒諸石以慰黔首思以彰前人善也一老前悽然曰小人長蓬蒿中昧政理但記成化間有任侯者蒞吾土欲徵科必以時等殺視豐嗇貧乏者恆無窘迫優於

聽訟論道理及利害訟者自悔悟卽聽罷不鈞致退
咸相戒以勿擾政稍暇輒行隴畝間見稼穡時及耕
耨不力者召勗之曰民所賴者食田食所出也汝縱
不自愛汝父母朝夕養何所給耶怠於農務卽不孝
中人暨來歲阡陌皆豐植戒閭閻以恩義相糾結有
小怨勿相讐時振貸民四時不苦饑又仁愛出天性
雖於行旅炎暑時郵舍恆給茶以濟渴於役夫寒烈
時必約里給餐粥餘善政在人耳目者不及悉此其
概也當是時任侯亦不求赫赫名而事集而民亦安
其化而不以爲異也後來或嚴刻少慈愛則入隳廢

益科擾民益思任侯之恩愛政矣近非侯小人不得
至此地非侯人亦不能爲斯舉矣克宏感父老語遂
疏列遣介走都下謁予以丐言文予嘗謂人之相處
於一世在土之恩德有淺深故思慕有久遠或時日
或歲月任公去任三十年而墓木已就拱鞏之民獨
思慕如昔時非公之誠心善政深渥於民心能致是
乎古所謂循良之吏公殆無愧矣又有其善斯不蔽
人之善克宏爲此舉則克宏之樹立暨異時之思慕
亦可知任公諱義字制宜由鄉薦知真寧服闋轉茲
土家世山右平遙人

鞏縣丞劉公遺愛記 吏部考功司員外譙郡薛蕙

撰

後世去先王之時已遠法令異而風俗變教化不可卒興當是時也莫若務養民以先之民既贍足後世教化之興可頌先王之道可幾也然養民者宜先擇州縣之吏蓋州縣之吏於民爲邇得其人則州縣之民安不得其人則州縣之民病故爲政者在乎養民養民在乎擇州縣之吏欲治而慢於養民猶農之不田也養民而忽於擇吏猶田而不得耒耜也惡乎可哉夫所謂養民者非他使民衣食具足而亡夭殤耳

鞏縣志

卷之六

十四

經川圖書館校刊

世之說者以此爲迂緩卑近而不屑昔周公作無逸之書七月之詩以戒成王孟子舉王道之成以曉齊梁之君類皆小人衣食之事彼誠知養民以致王道其要不越乎此而非若後世之說也且其不屑乎此者是又心以爲易而未嘗知其難也今州縣之吏污暴則恣爲姦懦弱則不勝任中才則苟自全此三者於此必不能矣幸而不出此三者則今之所謂村吏也適又多自異而求可喜夸詡以感衆苛切以苦下事省而張之使煩俗安而駭之使動此其厲民顧不甚耶然則能養民者必明達敦厚廉平寬靜之君子

而他人莫之與也其亦難矣予讀漢書循良傳歎其誠有意於養民也然考其實大率閭閻田畝畜養種樹之事是皆後世以爲瑣細而不盡心者而古人蓋惓惓焉歷城劉公諱璟字顯玉天順自太學生授河南府鞏縣丞於時民猶淳樸公因以簡靜治之縣益無事時從一卒出入阡陌視稼行動惰或夜出邑中見績者旦必勞賜之於是民趨作業衣食有餘戶口蕃息值吏部尚書尹公不悅於小人得罪去位尹公歷城人也凡歷城仕宦高者謫削下者廢罷公嘗有德於偃師嵩二縣至是鞏與二縣合千餘人來京師

鞏縣志

卷之六

十五

經川圖書館校刊

上書乞留公不報公歸無一金之裝民爭致饋獻公又悉謝卻之送公者遮擁哭泣踰數百里不絕公之事始未如此可謂有意於養民者矣嘉靖二年長安沈侯源來令茲邑得公之遺事於父老侯喟然歎曰惟公愛鞏人甚而鞏人思公最久今不有紀述更數十歲傳聞寔遠非所以彰賢者之化慰鞏人之思也迺請予記之予因著公之概特反覆論之欲諷當世之士俾留意於養民非獨以慰鞏人之思而已

送劉戶部丁內艱還家敘 山西霍濮二州學正新

安曹端撰

皇明立天地之中建中和之極而真元會合之氣全
三光五嶽鍾靈毓秀所以公輔之器經綸之才出而
佐文明之運永太平之圖焉況河南爲天地之中山
無不明水無不秀人物之生歷代爲盛近世程夫子
許魯齋則又間世之英非常之才而承道學之傳焉
鞏邑著姓劉氏之子曰升高者鍾靈秀而爲英傑自
幼以讀書爲明道之方以行孝爲立忠之本直得程
許之心法允蹈聖賢之真趣永樂元年癸未以明經
領鄉薦明年甲申會試南宮登名進士對策天廷敷
陳治道實惟禹皋之陳謨非若賈董之對策也遂膺

高擢授行人司行人每承九重之命出使四方薄海
內外靡所不到不惟不辱君命而又克宣君德也九
載課最特膺超擢陞戶部員外郎上知其性資溫雅
進退從容語言不妄喜怒不形持心操節必格神人
之道足爲人之表儀乃命鎮守交趾交趾之人畏而
愛之則而象之莫不曰天上人也將及九載應詔回
京上甚器之不幸母夫人以壽終於家訃音至輒哀
號悲痛絕而復甦者屢屢焉其僚友之仁者慰之再
三而後少解也時余以霍濮二州學正考滿至京公
之同志張公鵬飛率同僚詣余邸徵言爲贈余素樂

心而拙於命辭固辭不已乃述其所問之概以畀之
復祝之曰養生不足以當大事惟送死可以當大事
公之歸也其在途其望邑其至家一依文公家禮而
行不感流俗之陋斯不愧於程許程許之行具在方
冊有不待余言之贅者公制終而起移孝爲忠仰光
前烈垂裕後昆余之望也亦公志焉是爲序

元

元故鞏縣尹中議大夫禮部侍郎騎都尉追封清河
郡伯張公神道碑 翰林直學士奉訓大夫知制誥
同修國史曹元用撰

鞏縣志

卷之六

十七

經川圖書館校刊

大中大夫參議中書省事張毅將赴河南廉訪使爲
其祖清河郡伯徵予文元用謹撰其行述伯諱恩字
某張姓解梁人考於金季嘗司解鹽今逸其名妣景
氏伯生於金承安二年仕至嵩州安撫使豪猾憚伏
州境爲清以直言忤時貴退處鄉里天兵定河南主
帥聞之俾仍乃職不獲已起視事嵩人稍稍來歸改
尹鞏翦榛棘以立治民有訟者諭之曰爾不孝弟力
田乃譁競若是耶其人慚退羣相告戒弗敢易以速
訟不得已刑人乃對之泣人目爲佛以至元九年四
月十九日以壽終享年七十八歲以至大元年二月

望日祔葬於鞏南青龍山北先塋之次后以孫毅貴
贈禮部侍郎都尉追封清河郡伯配王氏贈清河郡
君子四人長思敬初襲鞏令改鄆陵沁水洛陽大名
鄒平後陞江陵路總管府事皆以善治顯大名歲饑
發廩振之江陵水漲則預爲之防及水至民免於溺
均州壤瘠民婁諄切勸之耕耨遂爲樂土率以貧富
爲勝負先屏豪橫而後理其餘爲政大率多類此享
年八十有一歲娶韓氏生獻松江府判官次思信始
以百夫長統征蜀有功授忠翊校尉管軍把總攻襄
陽執俘以還遷昭陵校尉佩金虎符管軍上千戶行

鞏縣志

卷之六

十八

經川圖書館校刊

師不妄殺得賞賜以分宗族五十歲以壽終娶楊氏
生詡嗣職三思忠河南行省參政以子毅貴贈集賢
學士大中大夫上輕車都尉追封清河郡侯娶薄氏
繼蘇氏並追封清河郡夫人四思孝不仕其鄉邦以
善人稱者不一而足嗚呼盛矣郡伯之後多賢也蓋
其執樹德厚衍於其躬用之未能盡其蘊故溢諸遺
裔承休迭興未已也用爲記其實云

元故贈中奉大夫河南江北等處行中書省參知政
事護軍追封清河郡公張公神道碑 翰林侍講學
士通奉大夫知制誥同修國史歐陽玄奉勅撰

公姓張其先解梁人今家鞏縣子爲中書參議公贈集賢直學士大中大夫上輕車都尉追封清河郡侯子累遷江浙等處中書省參知政事公進贈中奉大夫河南江北等處行中書省參知政事護軍追封清河郡公及其孫爲吏部侍郎近臣爲之奏於上有旨翰林侍講學士歐陽玄撰公神道碑以賜惟公贈典致以子賜碑致以孫若享自然之福而膺身後之名徐考其行事二者之寵皆公之自致也子若孫致位於斯其致亦以公也公之父仕爲嵩州安撫使張氏之宦業在嵩矣以直忤時貴退而不居公少時署竹

監遺澤在矣以其厲民又退而不居是仁人君子之用心也張氏再世有仁人君子之心居之子若孫所以致今日者也公諱思忠字誠之幼靜重簡默羣兒追之不爲動侍立長者進退如成人稍長從諸弟入學舍先生見其蚤慧授以孝經使做書公受教卽能無苟且意先生謂其父曰此子他日必以儒起家浸長果日嗜學王師圍襄陽調庾吏給管其糧備不匱改司嵩州竹課甫壯年獨不樂爲復仕性孝友親病晝夜不解帶兄從軍襄樊三月書不達公徒步至兵間不避鋒鏑卒獲安耗歸寧其親然或道遇螻蟻必

遷步以避惟恐踐及一日謂其兄弟曰古人有十世同舉火者今何爲不然特非俗之不古歟兄弟感其言不敢謀析處鄉鄰有貧不能婚葬者視親疏有等無不有所周卹人有歸貸者付以量衡使自均其輕重隆殺爲報其不能者輒毀之劑遠近以忿爭見質隨以理折之往往弭怨家居隆師教子尤好眉山文嘗鈔百篇授諸郎使矜式暇曰從賓股觴詠自樂耽視世態泊如也至元二十七年四月二十七日終於正寢壽年四十有九以吉月吉旦葬洛陽南青龍山北之陰先隴嵩州公諱恩金季宦爲元戎以黨論與

達官齟齬勇退於家王師徇河南主帥聞其賢版以故職力辭弗已乃爲嵩人所歸未幾改鞏令有仁政號張佛以孫貴累贈嘉議大夫禮部尙書上輕車都尉封清河郡侯子四公居其三伯思敬見前不一而足子三人長曰毅卽浙江參政爲時名卿次曰規贈中書禮部員外郎三曰弼太常禮儀院同知孫男六人惟敏卽吏部侍郎有父風惟賢有文聲尤工詩詞郡掾禮部御史宋聚爲作張才子傳其他或仕或學俱進未已嗚呼盛哉先儒曰稱人之善必本於其父厚之至也豈獨朋友交際之道爲然人君之御臣必

於其先世重追往之典亦厚之道也厚之極致贈典
之外繼之以賜碑云

鞏縣志

卷之六

二十一

經川圖書館校刊